

Zaprepaštenost činjenicom da nije okončan Stankovićev bijeg



“Godinu dana nakon bijega Radovana Stankovića reakcije nadležnih organa su daleko od zadovoljavajućih”, rekao je jučer prvi zamjenik visokog predstavnika Raffi Gregorian. “Stanković je i dalje na slobodi, a organi vlasti još uvijek nisu dali detaljan izvještaj sa podacima o onima koji su mu pomogli da pobjegne, nisu zahtijevali odgovornost nadležnih, niti poduzeli mjere da povećaju sigurnost u zatvorima.”

Jučer se Gregorian sastao sa sudijom Faustom Pocarom, predsjednikom Međunarodnog krivičnog suda za bivšu Jugoslaviju. Obojica su izrazila zaprepaštenost činjenicom da organi Republike Srpske i BiH nisu pokazali rezultate u više aspekata nakon Stankovićevog bijega. Ni organi Republike Srbije nisu ni na koji način surađivali, uprkos činjenici da je Stanković pobjegao upravo u Srbiju.

Sud BiH osudio je Radovana Stankovića za krivična djela silovanja i zločina protiv čovječnosti počinjena u Foči 1992. godine. Stanković je bio prvi optuženik MKSJ čiji je predmet prenesen na domaće pravosuđe u okviru strategije zatvaranja Tribunala.

“Stanković je osuđen za silovanja i mučenja i predstavlja opasnost za društvo gdje god da se nalazi”, rekao je Gregorian. “On nije izrazio nikakvo kajanje za zločine koje je

počinio i postoji realna opasnost da ih ponovo može počiniti”.

Stankovićev bijeg skrenuo je pažnju na nekoliko nedostataka u kaznenom sistemu BiH. Nakon Stankovićevog bijega prošle godine, visoki predstavnik je pooštrio zatvorski režim na državnom nivou; zatvorenicima koji su osuđeni za ratne zločine prema odredbama državnog zakona više se ne dopušta odsustvo u toku vikenda niti im je omogućeno da napuste prostor zatvora bez odgovarajućeg nadzora. Republika Srpska ispoštovala je nove odredbe, no FBiH još uvijek nije, što je isplivalo na vidjelo u okviru skandala vezanog za Maktoufa. Također, i dalje se postavlja pitanje koliko je prikladno imenovanje Siniše Goljanina za direktora zatvora u Foči.

Pocar i Gregorian su se složili da međunarodna zajednica mora biti sigurna da će ratnim zločincima nakon suđenja i donošenja presude biti obezbijeđen adekvatan zatvorski smještaj. Pocar je rekao da MKSJ brine gdje i pod kojim uvjetima će osuđenici služiti kazne u BiH. Bosanskohercegovački zatvori su u lošem stanju, a osoblju je potrebna bolja obuka. Okončanje projekta državnog zatvora trebalo bi staviti tačku na ove probleme, no potrebne su promjene i u cjelokupnom kaznenom sistemu unutar BiH.